

春
在
堂
禱
文

春在堂雜文四編二

德清俞樾

贈通議大夫謝君傳

謝君元慶字肇亨別字蕙庭晚年自號東皋又號淡然其先世本陳留人後遷會稽又遷餘姚明崇禎時有曰振龍者避寇來吳遂爲江蘇吳縣人曾祖士鑄祖長源父亦樑君事祖父母父母以孝聞少時家業鼎盛姻婭皆貴顯而君布衣徒步若寒素然其於歌樓舞榭撈菹陸博之場終身未嘗闖入也弱冠喪父蹕踊哀號血涌出病幾死及喪母亦如之旣合葬於妻門外又以水患

謀改葬或曰是吉壤不可動君曰陷吾親遺魄於水中
博子孫科第可乎乃更竈焉後君逾四十未有子咸以
爲咎君曰修身立命俟之而已行年五十果生丈夫子
一君自幼工爲四書義有聲鄉社及孤露乃歎曰而今
而後祿不逮親矣因絕意仕進時家已中落恒產所入
苦不給而於從兄弟之子若女女兄弟之子若女皆鞠
育之如己出先世所遺田三百畝立爲義產族姻之孤
寡貧乏者咸有助其家累世以藥餌及錢粟施人人稱
謝善人家至君益恢大之日裹藥囊錢行委巷中見貧
病者予之風雨無間道光十一年江北大水與韓桂齡

潘功甫諸公集貲以食難民嬰兒之遺棄者留養之棺
槨之漂流者收瘞之十五年吳下大雨霖沍邪之地皆
沒君廉得極貧者四百餘家計口授粟日五合鰥寡孤
獨益之以錢人五百名門舊族有癰疾者倍其錢嗣後
遇災歲勸分同食君率爲倡胥門外故有大橋曰萬年
久圯不修君爲一書曰造橋徵驗錄見者感動橋工乃
集咸豐三年粵賊之亂益偪率里人行保甲之法慮貧
販之民無以生且爲亂言於官賑焉又爲米肆曰平糶
爲粥局曰平賣以賑貧民之不屑就賑者久之貲不給
乃創一法曰救命浮屠其法人以錢五十爲一願願多

寡視其力積微成巨得錢數千萬金陵旣陷難民踵至
置厰以居之其民之秀者別其厰曰慧業後二十餘年
有顯者焉又製耐飢丸使人散之丹徒丹陽閒活無算
七年冬十二月甲子君六十生日也親故雅知君者不
以酒醴爲壽率書券曰寒衣若干襲米若干石以助君
施君喜曰此足以壽我矣君少時善畫蘭輒鈐小印於
紙尾曰畫蘭易粟意在得粟以施也其好善之意至老
不衰蓋天性云蘇城將陷君以賑事不忍先去旣陷乃
閒關以出避居黃埭鄉人以粟帛餽者相繼問之則皆
佃農平日所減其租者也不則災歲受其賑者也君日

爲父老陳說 國家恩德戒勿從賊又縱談善惡之報
愚民感化故黃垓一區無劫奪者已而聞城中亂益甚
同宗多死難者憂憤不自勝乃發疾日臻將屬纊戒其
子曰勤學早修此吾父易簣時訓我者今語女語已遂
卒卒之日爲咸豐十年十二月丙戌年六十有三君生
平善舉例得獎叙者率推以予人故以布衣終以弟錫
慶官贈通議大夫妻楊氏贈淑人先卒側室張氏生子
家福字綏之卽君五十時所生者也勇於爲善能繼君
志有聞於時

論曰江蘇爲東南財賦所出而上海一隅爲其門戶故

海內有水旱偏災謀賑者必於上海而力成其事者則皆謝君綏之也綏之以蘇人寓上海善士之稱聞於

朝野余今年過上海見其人恂恂然君子也出其先德蕙庭先生行狀乞爲家傳余讀之乃知綏之之行善有自來矣詩不云乎教誨爾子式穀似之穀之言善也若謝氏之世以善人稱其爲穀也不亦大乎夫景惠陰德罕樂陽施皆以長世遐紀炳然史冊吾知謝氏之興未有艾矣

樊母馮太夫人傳

樊母馮太夫人蜀人也乾隆之季川陝大亂隨其父處

士馮公避地於沌陽遂歸咸甯封榮祿大夫樊公爲側
室樊公以子貴封而子卽馮太夫人出故封與公同焉
公有如夫人者四馮太夫人尤婉婉柔順得公歡心事
嫡陳太夫人如母遇其儕輩猶女昆弟也撫嫡子如其
子生丈夫子二其次子殤會嫡子二人亦殤乃茹痛爲
陳太夫人百計慰解不敢以喪其子幾微見顏色人尤
難之其長子則河南府知府王農樊君也教之極嚴遲
明卽趣使就塾甫弱冠郡試第一隸邑庠未幾領鄉薦
而太夫人督責之如初每入都應禮部試必戒以慎行
止謹交游曰男子不患名不立患行不修耳無何崇陽

人鍾仁傑據城叛咸甯與崇陽近羣情恇恇謀他徙太夫人誠家人曰汝曹無恐 朝廷惠養黎元額征不及十之一何負於民彼乃抗不納糧倡爲戎首天理所不容行就殄戮矣會縣令王公勸民用搏力古法以禦賊無應者太夫人命王農君往散家財募士卒不足則撒環瑱助之賊不能犯事平論功以知縣用俄選授河南中牟縣太夫人從之官戒之曰官之賢否定於隸官之初宜事事檢束勿以自信無他遇事任性凡居官者清而不刻嚴而不酷斯爲善矣王農君終身誦之中牟大旱請帑金以賑太夫人曰凡賑之道與其遺也不如其

濫也聞窮民生子女多不舉命設局養之全活無算及
去中牟諸婦孺拜輿前者相望也牟之士大夫則歌之
曰先正有言兮活一人者錫福自天太母所活兮其數
盈千歌燕喜而卜餘慶兮錫純嘏以延年後數歲太夫
人卒於安陽縣署年六十有六太夫人持家節儉而御
下寬厚於臧獲婢妾詢疾苦問饑寒常謂子婦曰彼亦
人子也宜善視之故卒之日左右者皆哭失聲生平無
疾言大笑賓客之登其堂者未始一聞其警效也尤勤
於女功中年以後目力稍衰乃紉色絲爲辮至老不休
所衣非補綴至再勿易樊氏素豐於財太夫人辜較一

歲所入完 國課外悉以濟族之貧者遇祿歲所入不足則命玉農君補益之曰年例不可缺也玉農君每月進錢如千倆太夫人不時之需藏弃不用臨終指示家人曰所積得數百金矣可取以營什一之息族有不能婚葬者以息錢予之此吾素願也其天性好善臨終猶不變如此玉農君子孫振振並有聞於時皆太夫人所貽也

舊史氏俞樾曰嘗讀三國志鍾會傳注載會爲其母張夫人傳稱爲太傅成侯命婦蓋會之生母也傳中盛稱母賢明且能以經術教其子然會以志大心迂卒及於

難負此母矣今觀馮太夫人之教與王農君之克承其教是過鍾氏遠甚宜其子孫振振方興而未艾哉

河南府知府樊公傳

樊公諱琨字玉農湖北咸甯人自幼善屬文弱冠試於郡冠其曹遂充縣學生道光十一年應鄉試中式再試禮部不售時公之父年高望公甚切乃入貲以州判分發四川非其志也俄奉母諱歸未幾父亦卒服闋請於吏部注銷原官仍以舉人試禮部又不售會湖北有鍾仁傑之亂仁傑據崇陽叛咸甯當其衝咸甯令王君命各鄉以搏力之法禦賊無應者公括家財募死士鵷然

成軍賊不敢犯咸甯以甯大吏上其功 詔以知縣用
旋選授河南中牟縣知縣是歲爲道光二十三年舉行
鄉試公甫至卽充同考試官得士九人試畢之中牟中
牟巖邑也南多沙磧北濱大河東西又爲孔道地瘠而
民貧役繁而賦重公始至值河決已而又遇大旱水旱
交至民益大困公請於上官發帑金賙之設粥廠以食
餓者日必親至以貧民生子女多不舉創立育嬰堂全
活無算又教民穿渠蓄水爲水旱備民利賴之名曰樊
公渠公治中牟凡五載及調知安陽縣牟人思之爲歌
詩以獻者無慮數百篇又以公嘗出錢五十萬助景恭

書院經費刻石院中頌公之德焉公治安陽如治中牟
安陽民素雕悍有紅衣而帶刀者曰刀客橫行閭里爲
良民害公名捕其尤悍者數人杖斃之餘皆易服逃去
大吏以公治行上聞將擢用之以丁所生母憂去官大
吏交章奏留總理軍需局序功以知府用旣免喪授河
南府知府方是時賊蹤徧兩河墮城殺吏無虛日公練
兵籌餉以戰以守河洛之閒恃之以安 詔加公鹽運
使銜 賜花翎焉咸豐十一年皖賊西犯攻虎牢不克
由閒道襲鞏縣公率師禦之遇於黑石關夾河而軍賊
屢以筏渡河輒擊退之會河水驢長筏無所施賊遂宵

遁是役也非公督眾力戰則河洛危矣公不自居功以河水驟長謂有神助請於朝加河神封號云公守河南久負時望咸謂將大用而與大府有違言讒人又交搆之竟坐免官公在官時奉入夥够或勸爲子孫置田產公曰官錢可爲私計邪性好士幕中客常以百計四方賓客稍有一面之雅供其資糧屏屢必陪於常以故去官之日家無餘財又以家鄉遭兵亂不能歸仍寓居中州終焉同治七年公年六十矣時寓居鄆城將卒前數日自鄆至省城與諸僚友談讌甚歡比歸鄆又與客談至丙夜客去始休甫就枕俄頃間卽起呼家人至曰

吾將逝矣處分後事語畢而卒一時皆驚以公爲非常人也公少時事親至孝父之故舊悉以豐禮款留之俾朝夕共遊讌以博其父歡所娶余夫人亦賢生五子希楠候選道希棠副貢生兵部郎中山東曹州府知府希棣貴州候補道希材候選同知希槩舉人刑部候補郎中諸子皆材而希棣尤奇偉余別有傳

舊史氏俞樾曰余咸豐閒視學中州而公適守河南郡一見如故承以次女爲余長子婦焉公恂恂長者而材略過人其強識尤不可及凡公牘文字一過目輒能背誦歷久不忘以公之才當咸豐同治多事之秋謂宜一

歲三遷膺受節鉞之寄而竟止於此邪嗚呼士之才者未必見用見用矣又未必能盡其才有志之士所以三太息也

貴州候補道樊君傳

樊君諱希棣字萼樓河南府知府樊公琨第三子也幼隨其父在中州讀書習舉業已忼慨有大志以兵亂塗梗不得回湖北原籍應試乃挾貲入都將博一官徧詢於人曰今仕途所尤畏者何地邪咸曰無逾貴州君卽以布政司庫大使指分貴州人皆危之河南公亦以其年幼爲慮君曰兒自願之必不貽父母憂旣至貴州桐

梓有亂民鳩眾以叛苗夷皆從之而起黔中大聳大吏
廉知君才檄署貴定縣知縣貴定在省城東北九十里
乃省城之門戶也君下車訓練卒伍激厲士民爲戰守
計賊不敢逼每歲春耕秋穫輒以練卒防護農民故四
郊多壘而三時無害久之賊勢愈熾鄰邑盡陷惟貴定
獨完賊以不得貴定不能進窺省城乃合長圍以困之
君晝夜棲止雉堞閒與士卒同甘苦賊近城則出奇兵
擊之大小數十戰殲賊無算賊少卻則以其閒率所部
收復附近歸化定番廣順諸城當是時大府亦倚君爲
重而貴定之民戴君尤甚君時已由庫大使歷升知縣

同知直隸州知州補仁懷直隸同知 賜託喀台巴圖
魯勇號 賜戴花翎旋有 詔開缺以知府用然君猶
署貴定縣如故每以事至省城必有數百人從之君止
之城外而從入者猶數十人至則噪於大吏之門曰無
奪我好官故君在縣猶以縣令冠服視事不敢言已遷
官也賊畏君甚百計密圖之一日欲鬚頭呼刀鐮之工
至其人見君而色變問之乃實告曰賊以千金賂小人
使乘閒害公耳君曰若然汝將害我乎曰不敢然則汝
執汝業不汝罪也一日出行城外突有人剗刃輿中削
冠綏去半視其人官兵也執問之賊所僞爲者從者皆

擣舌君神色自若其後賊賄通飢卒爲內應探知君寓城南關廟中黑夜蛾傳登城攻關廟而是夜君適在署聞警從牀上躍起跳而出傳令守陴之兵毋妄動毋使賊得繼至乃奮身奪賊刃與賊鬪城中兵不百人然皆死戰自丙夜至戊殺賊殆盡遲明城中亂定君回署衣盡赤解視之凡受七創皆深入四五寸城中訛傳縣官傷重而死君裹創出行通衢以靖邑人又鞠所俘賊得內應者主名自副將以下數十人是日皆入署賀戰勝悉縛而誅之然後白臺司且請治專戮之罪臺司諸公嘉君膽識然亦以其傷重不欲其久居危地乃使人代

之俾君入省城養傷君既去貴定未幾貴定竟陷於賊
省垣震動強起君攝貴陽府知府君力疾視事內安外
攘不遑啓處而大府又以遵義府爲賊覬覦恐爲所得
檄君往守之未至又以遵義所屬正安州民變命往案
其事君單騎至正安撫定其眾而亂首不可得一日按
簿籍呼諸吏役名見一役長鬚而豐頤似素識者久之
乃憶初至黔時署按察司司獄其人曾來行賕彼時卽
知其人非良善也鞠之得實竿其首遂以無事已而粵
賊石達開自蜀回犯遵義與土寇相鉤連連營百餘里
君由閒道出兵乘賊不備擊走之土寇悉平 詔書褒

美命以道員記名簡放曾有傳習邪教者制軍勞公使
君治其獄君以脅從者宜赦與勞公意不合爭之過切
勞公怒疏言樊某固執已見與臣抵牾於是吏議撤銷
所記名已而黔撫張公又疏言樊某性情倔强不善事
上官固咎有應得然其治此獄甚合事理督臣未免偏
執且樊某在黔素得民心今處不當罪恐乖眾望於是
又有詔復君原銜久之 奏署糧儲道時賊復據貴定
龍里等城巡撫曾公檄君督勦復之 賜加布政使銜
當是時黔中亦略定矣君在黔垂二十年與兵事相終
始所在有功其名甚著官貴定時從十餘騎行山谷中

遇賊大隊至賊見君遽曰樊萼樓來矣則皆走最後勦
龍貴之賊賊望君旗幟驚曰聞樊萼樓已死矣得毋誑
我乎君怒馬獨出曰余在此賊皆辟易麾眾擊之大敗
之其爲賊所畏憚如此無何河南公卒於鄆城君自黔
奔赴奉其喪歸咸甯服闋入都由吏部引見蒙 召對
一次命還黔君雖以將才顯而居官實克舉其職所至
必興復尙節育嬰諸堂以收養嫠孺又增益書院膏火
以興起文教興利除弊不遺微細黔城之外有湖曰小
烏江君署貴陽守偶經其地見湖中魚甚多無漁者問
其故或告曰此湖神所居也一施網罟水卽湧起君曰

妄耳烏有是呼漁者至督之漁水果湧起次日又往復然父老皆諫君不聽又次日又往則水不復湧矣至今民食其利焉君廉而好施與凡故舊來投者可用則用之不可用厚遺之必滿其意故厯官守令而不名一錢以積勞成疾又感受溼氣於光緒二年某月日卒發其篋止白金十二兩而已年四十有八卒之日民幾罷市歛之日傾城往送其親屬轉無容足之所其喪之歸也黔之士大夫皆素服送之巷哭野祭者相望又言於官請爲立祠格不行黔人至今惜之

舊史氏俞樾曰君本儒家子恂恂然非讀孫吳之書者

也一行作吏遂爲名將君之用兵殆所謂天授非人力
乎君以末秩至黔不數年遂以功名顯不可謂不遇矣
然君之志固不止於此嘗自言異日 國家有事四夷
雖死不辭烏乎其壯哉今天下雖號無事而伏莽之
戎所在多有鱗介之族亂我冠裳尤志士所同憤君子
聽鼓鼙之聲則思將帥之臣如君者可以深長思矣
女子錢芬傳

乾隆閒江南有才女曰錢芬字左才常州武進人也父
枝起字方高工部主事左才幼而慧父授以毛詩輒通
曉稍長能詩且工畫所居曰段莊就其景物爲江村圖

題詩其上以尺絹繡之詩字繪繡皆佳見者歎爲四絕焉及歸同里楊瑤瑤字濱洲其父爲式齋明經與方高皆以能文名左才善事之三黨皆稱賢孝然體弱善病中年後又劬於家事并曰刀尺不假手婢媼俄而父兄相繼歿益鬱鬱不自適未幾母亦卒朝歆暮嗜病遂不起於乾隆二十六年十有二月某日卒傳者失其生年年若干歲不可考矣予二人長濟恩爲縣學生能詩文次湛恩亦善畫左才集中有示凝儒兒詩卽濟恩也又有側室子二人曰洽志曰瀄意洽志善畫仕女時稱楊美人云

論曰乾隆時常州多才女如莊蕢蓀之悟香閣草吳永和之苔窗拾稿當時皆盛稱之然皆不逮左才左才有姑姊妹二人曰守善曰守芳亦工詩然亦不逮左才故左才才女之名至今其鄉里猶傳焉余讀其詩多思親憶姊悲傷憔悴之音豈其所遭之境固有難言者與嗟乎左才卒於乾隆辛巳之歲至今歲又再值辛巳蓋百二十年矣余所謂誦其詩不知其人者又烏足以知其意哉然其詩則可傳矣聞其族孫佩瑗將重刻其詩以行於世庶足慰才女於地下乎

姚君妻張夫人家傳

夫人姓張氏浙江嘉興人父以銘江蘇布政司理問生六歲入塾讀書穎悟過男子理問君嗜金石書畫以此耗其家貲夫人稍長卽能佐其母治家年二十歸於姚姚故禾中右姓自明以來祀鄉賢者三人道光二十九年大水其君舅笛秋君捐萬金振鄉里禾人稱焉姚君名文枏字訪梅爲人通敏有智局以長蘆鹽運司同知攝鹽運使旋以道員候選加布政使銜夫人相之四十年中間遭逢離亂閱歷盛衰卒脫諸險重履亨衢固姚君之賢且才而夫人亦與有力焉其始來歸也笛秋君知其能悉以家事委之凡所區畫無不當俄而粵賊自

江蘇安徽擾及吾浙夫人聞警卽佐布政君部署諸事
奉家廟栗主及祖父遺像以行初避嘉興之南鄉用搏
力之法衛鄉里已而由澈浦之紹興之餘姚之甯波之
上海之南通州之寶應族中人避寇難者皆從之而至
夫人輒分宅以居之衣食無私焉又由鹽城浮海至膠
州陸行而達天津謂布政君曰此地雖在海濱然距
輦轂近可託以庇吾家矣乃出所齎金帛營鹽筴之利
又以布政君方服官不欲以私事煩之千緒萬端手自
擘畫雖老於權會者謝弗如不數年富於其舊乃進諸
子而恣慎之曰遭亂以來故家子弟簞瓢捭茹頗頗煩

於人者不知凡幾矣汝曹承先世餘澤靡衣鮮食如故
可不知所勉乎諸子咸從其教克自樹立夫人以家計
粗足益務爲善先命長子寶勳省視先塋自明太傅公
以下咸修治之太傅公故有專祠春秋官爲致祭亂後
廢不舉言於官復之曰此兩者皆興復之要務也禾城
之西有茶禪寺寺前有三塔相傳下爲龍穴所以鎮也
塔毀而在屬時作舟行畏之夫人出貲建其中塔而左
右兩塔亦助之成民賴其利他如義學義園諸善舉無
問遠近有告必諾同治十一年津郡有洪水之災城外
諸淺葬者爲水所發棺槨隨流而下夫人命舟四出鉤

撈至距城七十里地曰鐵嶺得棺以千計其有可別識者招其人而歸之無者買地而葬之津郡舊無厲壇夫人曰祀孤亦朝廷仁政之一不可廢也出銀千餘兩爲之倡津郡之有厲壇自夫人始也夏大暑必製藥餌以療病者歲暮必分粟以食餓者紉衣以衣寒者津郡兩遇水災皆振卹之光緒中自趙代以至秦晉皆大飢夫人所捐助甚鉅有詔旌焉其待宗族尤篤有貧乏者月必餼之嫠婦則加厚焉布政君之弟早卒撫其孤子至於成立其居室時孝於父母旣嫁無踰月不歸省其幼弟依之以生今官永定河同知能舉其職夫人之

教也晚年喜誦佛書嘗曰勸人爲善儒釋無殊余不能
參無上妙諦但知就此心此理檢束而已以 國朝王
澤注所著金剛經句解文理明晰刻以行世焉君姑沈
太夫人以病居禾中故第夫人以不得迎養爲憾每遇
其生日及布政君生日必多買禽魚縱之林沼蓋亦用
佛氏說也光緒九年夫人年六十矣其生日亦如之時
直隸又有水災夫人施棉衣五百襲親督婢媼爲之俄
而感疾十一月己丑卒卒之日遠近聞之有歎息者有
哭而來弔者蓋平日善之及人深矣子二人寶勲恩衍
服官中外並有聲孫四人孫女六人恩衍先夫人卒其

女曰引璋自六齡卽依夫人同臥起夫人疾引璋曰脫有不諱必相從焉旬日之間竟以歿卒年甫十有六是宜附夫人以傳者也

舊史氏俞樾曰同治之元余航海至天津而訪梅亦至焉皆避寇亂也以鄉人之誼時相過從已知夫人之賢及余南歸又爲夫人之弟平章娶仁和周氏女蓋余外姊之女而在余婦則女兒之女也余於是於夫人之賢益知其詳矣訪梅悼夫人之亡請爲家傳以存其人余惟內子姚夫人亦以二十歲來歸其卒也年亦六十適與夫人相同而中間更歷富貴貧賤患難其情事亦有

近之者語不云乎家貧則思賢妻叙次夫人事殊觸吾故劍之感矣

韓烈婦傳

韓烈婦姓費氏江蘇吳縣人父某官直隸長垣縣知縣幼讀書明大義年十二其母徐及其生母李相繼逝哀慟如成人及長許嫁同縣韓少蓮韓父蓮洲君曾權知河南溫縣前卒少蓮奉其母錢宜人依其姊壻居保定光緒九年八月就姻於長垣旣成禮甚相得而少蓮故羸弱途中又感疾俄病篤婦百計醫療剖肱肉藥以進竟罔效明年正月丁亥遂卒婦慟甚誓從死家人環護

未得聞婦私念吾父年七十矣若死於此傷老父心不可乃忍不死奉其夫之喪歸於保定拜其姑時錢宜人瘍生於指婦晨夕吮血傅藥不脫經帶者旬有五日姑疾愈承姑命奉喪歸蘇州而貧不能成行輿軸之費撒環瑱佐之乃克歸於先兆族長老聚謀謂婦之賢不可無後以其夫兄之子濟修子焉濟修方從其父居河南婦寄以五經一表硯一枚日期爾繼乃父書香也濟修未及歸而婦竟以八月己卯仰藥死檢篋中得遺書言曩所以不死者恐傷親心且以夫柩未歸耳今則可矣婢媼輩幸無救治我徒苦我使再死無謂也其附身附

棺之物皆躬自料量人無知者蓋其死志久定矣年二十有七自成婚至徇夫以死甫一稔耳有絕命詩八章濟修刻以傳於世讀者悲之

論曰余讀烈婦絕命詩知其母疾篤時亦嘗有割股之事以十二齡女子而能辦此天性固過人哉其夫有妾曰麟徵遺詩中猶及之勉以事姑其賢孝又可知也成婚四月遽失所天艱難歸里從容赴義嗚呼雖古烈丈夫何以加茲

卞節婦傳

卞節婦姓孫氏浙江歸安人父崑字均亭母氏談名印

梅才女也有九疑仙館詩集頗行於時湖州府志有傳
婦年二十有四歸於卞爲廣西候補主簿卞君乃諳繼
配歸三載而卞君以病乞歸旣歸病不瘳婦事之謹膳
羞手治之藥餌口嘗之道光十有七年二月卞君卒蓋
距來歸時僅六載耳慟甚以姑老子幼忍不死事其姑
孫氏益嚴有所使不宿而辨有酒食必先以進子祖海
甫六齡卞君元配陳氏所出也愛之如已出幼則飲食
教誨之長而娶婦生子女矣猶治其家事至老不倦於
是鄉人士君子聚而言曰如節婦者所謂青年守志白
首完貞者歟且守節逾三十年於例符矣乃於同治十

三年八月言於官問於 朝依令甲旌其門而縣令許公盛復大書四字以褒美之曰貞心勁節

舊史氏俞樾曰余幼時卽艷聞菱湖談氏印梅印蓮二女史之詩名及長得讀其詩爲之作序今存賓萌外集中節婦貞一之性固受之於天亦其稟於母氣者至清而至淑歟節婦猶在於法不當立傳余徇其鄉人之請而爲此者蓋節婦之志久定矣豈必待其沒身之後而後論定其人哉撮大略著於篇附其家乘可也

石船徐公家傳

錢唐徐氏爲吾浙望族自文敬公始文敬公之子爲大

學士文穆公文穆公之子爲宗伯公諱以烜 國史皆

有傳宗伯公生丈夫子七公其三也諱紹基字厚梁別
字右船當雍正六年歲在戊申文穆公方爲貴州學政
宗伯從之至黔而公以生焉生二年而宗伯公成進士
入詞林又十八年而文穆公卒又六年而母俞夫人卒
旣免喪爲乾隆二十年歲在丙子公以治易應順天鄉
試主試者諸城劉文正公漳浦蔡文恭公得公文賞其
有奇氣取置第十八及發彌封徐文敬曾孫也曰是得
人矣而是科宗伯充順天武鄉試主考官父典武闈子
捷文闈談者美之其明年宗伯知貢舉公迴避不與會

試及宗伯以內閣學士引疾歸而公已以舉人仕廣西
爲東蘭州知州任滿遷安徽安慶府同知乾隆三十六
年宗伯公年七十矣公將馳還爲壽未及期宗伯遽捐
館舍公慟哭曰天平胡半月之暫而不我假乎服闋補
江南淮安府海防河務同知是時江南全盛淮上爲河
工人員所聚風俗浮夸服食奢侈公法晏子國奢示儉
之意務爲省約嘗與同僚聚坐或笑其褻敝公笑曰幫
雖敝底子佳也其語意微婉類如此嘉慶五年八月壬
申以積勞卒於官年七十有三娶陳氏海甯世家女兩
家門弟皆極盛而能以樸素佐公清德少公一歲後公

三年卒生子一寶鑑湖北縣丞副室馬氏亦生子一是
爲杉泉君余別有傳女子子三程君德保孔君獻堃程
君金皆其壻

舊史氏俞樾曰昌黎以殿中少監馬君爲稱其家兒夫
金張世族黃散舊家而能稱之斯亦難矣如公者非所
謂克稱其家者乎雖名位未大顯然積厚流光慶延其
後韓底之喻可以深長思矣

杉泉徐公家傳

公諱鼎其家譜名祖錫字聖植別字松巖亦曰杉泉錢
唐人徐氏文敬公元孫也曾祖大學士文穆公祖以烜

內閣學士兼禮部侍郎銜父紹基余所爲作石船徐公傳者也公生於乾隆四十年歲在乙未生數歲卽侍石船公於官舍習聞吏事故生平以官績著年二十六丁石船公憂甫逾年丁生母馬太宜人憂越一年又丁母陳宜人憂及服闋年已三十二矣時家中落屢應鄉試不售乃以縣丞分發南河俄遷山陽縣知縣山陽故多盜公捕治幾盡行保甲法以清盜藪又教以詩書齊以禮俗民頑丕變盜風遂絕陶文毅公知其賢調任上元公處繁劇如行無事案無留牘獄無滯囚仍以其暇應接賓僚倡導風雅戴星之勤鳴琴之逸兼有之矣已而

又由上元調南匯其地素稱沃壤財賦饒衍甲於三吳
居是官者靡弗優渥公悉以所入加書院之膏火助善
堂之經費齋厨蕭然至不能自給去官之日無所贏有
所負鬻田不足以償并圖籍書畫鬻之以償官錢所謂
身處脂膏不能自潤者也道光十二年三月甲申以疾
終於里第年五十有九妻孫氏後公二十三年卒年八
十有二子二人鴻度江蘇崑山山陽縣巡檢鴻謨是爲
若洲君余別有傳孫三人愐原署江蘇山陽縣巡檢國
隸候選府經歷琪翰林院編修公以琪貴 贈奉政大
夫妻宜人公雖不以科第進而喜文詞工翰墨尤善爲

篆隸書南匯人至今寶之光緒中琪至南匯其邑人有
改再薈者以公手臨漢碑數種來歸亦見其遺愛之在
人也琪又言公善於製墨得易水遺法有獲其一笏者
珍如尺璧今不可復得矣

舊史氏俞樾曰余居江蘇久聞上海南匯青浦三縣爲
仕途中所豔稱有上南青之目公宰南匯乃反以致累
誠廉吏哉清德之報在於其孫觀於花農信矣誰謂廉
吏不可爲也

徐若洲君傳

君諱鴻謨字若洲浙江仁和人故吏部尙書徐文敬公

之來孫東閣大學士文穆公之元孫禮部侍郎諱以烜
者之曾孫也徐氏於南宋初由河南遷浙之蘭溪又由
蘭溪遷杭自文敬公以下三世皆以翰林起家爲杭右
姓祖諱紹基乾隆二十一年舉人淮安府海防河務同
知考諱鼎江蘇南匯縣知縣君其次子也少孤隨其母
孫宜人依外家居平湖年十二作觀潮賦驚其長老十
四歲入縣學應鄉試五薦不見取君素有大志道光中
葉海上始用兵獻籌海十策不用及和議成君撫髀太
息有經世之志又以母老冀以祿養乃入貲爲從九品
分發江蘇歷署上官時堡司巡檢又署江都甘泉兩縣

典史咸豐五年署揚州府經歷兼理清軍同知同知五
品官以從九品攝之重其才也俄孫太宜人卒於如皋
君以不及視含歛欲絕食以徇其友顧梅卿以大義責
之然後乃始食食服闋奉檄治揚州善後局文書君說
太守仿古制製輪機礮連臂弩自練一軍命之曰忠義
軍會粵賊破來安縣溫壯勇公時以道員駐六合率兵
二千救來安檄君參其軍暮與賊遇隔河而陣彼眾我
寡鉛藥將盡君言於壯勇請滅炬使不我測從之一夜
礮聲不絕賊疑我兵眾遲明遁去遂克來安壯勇上其
功而某大帥與壯勇不合反責其公牘內首列總兵某

君非制也令曰此後毋出六合一步壯勇憤懣後竟死
六合而君之功遂不見叙八年賊再犯揚州太守發兵
迎戰皆大敗賊薄城下乃使君以五十人拒之君大呼
馳出手刃數人斬其黃旗頭目一人賊發火銃中君右
目顛一賊以刃加頸膚裂血流又一賊以矛刺其兄曰
是已死矣乃舍之入城有民自城中出者見之曰此非
徐少尹乎好官也胡死此撫之尙有氣解衣裹其首負
之行至仙女廟大營飲以水漿乃蘇鄉人許君緣仲牧
泰州迎君至署凡十月創始愈出鉛子於右目重五銖
其形曲蓋鉛經火而柔深入卻歟故隨之倨句也是役

也君以禦賊受巨創亦無以上聞者而君遂眇一目矣
十年署桃源縣典史縣境陷賊中不能往仍從事揚泰
閒明年又署瓜步司巡檢未踰年又署呂東司巡檢地
濱海每歲石首魚山漁者輸金請給執照乃得出海捕
魚君予以照却其金民有訟者君以一言折之皆服遇
文士與論詩文人比之孟東野官舍之左有浮圖焉颺
作而地占者曰是不利於文人君偶出謁客得疾而歸
歸而疾篤君之子珙年甫十有四割臂肉羹以進竟無
效同治三年六月戊子卒年五十有二君以薄宦出入
兵閒又以家鄉淪陷親故凋零恒抑鬱不自得方揚之

初陷也君尉江甘已受代與妻鄭宜人奉母及寡嫂張
猶居城中君有袁江之役寇猝至城陷家屬倉卒出城
中道相失歷數月始會於如皋失一女與其兄子君楫
於衢曰得吾兄子者予錢十萬果得之君曰是可以慰
吾寡嫂矣吾女聽之耳俄而亦至人皆曰是有天道其
署瓜步巡檢也自泰州溯江摩賊壘而上至則前官攜
印亡去不知所之無可受事寄宿六合令舟中舟隘不
能容又無他舟俄有漁舟來姑問至儀徵可乎曰可君
與幼子及一僕入其舟倦極而寐漁者呼曰至矣旁有
舟頗寬可暫居也視其舟有盛饌問奚自曰漁翁使我

治具待君也出覓漁者欲予之值則人與舟俱不見因
思自六合至儀徵江路非近何以俄頃而至蓋神助也
君貫通經史尤好兵家言精奇門壬遁之術能布八陣
圖隨意疊數石使兒童入之終日不得出父南匯公工
篆隸書君得其傳凡書畫及鐫刻金石皆極精妙自孫
太宜人歿君頗好佛法通內典嘗注楞嚴經識者讚歎
以爲希有其外所著有十願齋一家言論墨元品奇門
輯要簷蔔館稌文及詩詞各如千卷妻鄭宜人賢而才
余自有傳生丈夫子二長卽琪也光緒元年 恩科舉
人六年成進士今官翰林院編修 國史館協修次子

璠死揚州之難女子子二長適同邑袁啟瀛其在室時
刲臂療母疾母愈而女竟以臂傷不永年卒後以孝女
旌次女殤孫興東孫女四初鄭宜人如在如皋聞君於揚
州力戰受傷將往視之乃先葬孫太宜人於如皋東門
之外而後行及鄭宜人卒亦葬其旁君卒將合葬發之
有紫藤繞於棺人之見之者以爲吉徵故遂葬如皋如
皋人亦雅重君同治初修縣志列君寓賢傳

論曰吾親家翁彭雪琴尙書其贈光祿公官安徽巡檢
有惠政尙書以諸生起家至八坐贈公之遺澤也君官
亦巡檢負文武材未竟所施而卒而君之子花農太史

已成進士入詞林有聲公卿閒天殆將昌其家如彭氏
乎花農從吾游有年矣余望其繼文敬文穆兩公而起
也故撰次君傳而以彭氏爲比花農勉乎哉

傅商巖傳

君諱羹梅字商巖姓傅氏浙江德清人先世居三墩明
嘉靖間有諱銓者始遷尙博邨銓生沾沾生榜榜生士
德士德生九鼎則君曾祖也九鼎生廷琇廷琇生同聲
是生君君始識字卽知問字本義及受經默而識之背
諷如流旁及醫書宅經咸通曉弱冠入縣學三應鄉試
不中式乃入蜀覆舟於道士泐喪所齋或唁之君怡然

曰不厯崎嶇安得坦途蜀中聞君名爭延致焉先後主按察司某君及墊江酆都雲陽忠州綿州諸君已而由豫工納粟以府經歷分發雲南乃自蜀入滇署臨安府經歷有溪處土司趙理以罪誅其旁支曰趙維藩襲其職與頭目李開元有隙理之子平安煽之遂大鬬知縣某右平安眾洶洶變叵測君以轉餉至得其情力言於縣事乃解又署昭通府經歷道由恩安縣時久旱君至大雨恩安民喜曰是殆將父母我已而果署恩安縣君先時經其地見山麓豎大木其下焦骨槩槩然有數十人驅一乳臭兒至君駐輿問故曰吾鄉惡盜得則焚之

是兒盜田黍宜焚君則然予之錢償所失黍縱兒去語
官其地者是宜禁勿聽君妻姚謂君曰異日君自禁之
及是集諸豪中大禁皆譁曰是縱盜也君不爲動竟革
其俗按所植木縣童生之應歲科試者舊試於署童自
以儿案來君憫其勞創立考棚儿案咸備每試手定甲
乙學使無以易遇諸生以禮然或以事至訟庭不少假
顏色士皆自愛訟益稀縣境有石龍壩河以河口石蜿蜒
如龍故名河淤甚夏霖暴至激石倒流兩岸皆沒君
履行繇海口橋而老鴉巖而灑魚河而賢樂灣咸疏濬
之石龍堅滑不受鑿以麻纏石沃以油燭之積年水患

一朝而已民爲之謠曰我食我衣傳公富我我婦我子
傳公父我院司謀以君卽眞會同知某攝知府事忌君
遇事輒齟齬之君乃引疾去去任之日民以觴酒豆肉
獻者溢於衢士之能文者爲繪甘棠圖紀以詩父老獻
新穀者不之縣署而之君行館猶道君鑿河事勿置君
居官日積奉銀三百輒作一利民之事坐是無歸資寓
四川之宜賓逾年以在恩安時行部遇雨水沒馬脊中
水毒生瘍至是大作咸豐五年冬十一月甲戌卒於宜
賓年五十有六君性孝友昆若弟負人錢輒代之償伯
兄有瞽女曰開爲置田贍之從子埜廢學歲予之錢曰

毋輟讀方橐筆州縣帶巾已爲族人置祭田置義學叔
季兩弟謀分居議定矣君在蜀以書諭之皆泣同居如
初君旣罷官季弟白里來與偕至蜀而卒君哭之慟亦
遂不起先娶於張繼以姚生子四雲龍兵部候補郎中
雲萬刑部候補主事雲夔以孝旌雲昭先君卒君以
雲龍官加級封通議大夫妻張及姚皆恭人

舊史氏俞樾曰余丙戌春始識傅懋元駕部雲龍於京
師有學有行君子人也以其先德商巖君年譜行述見
示請爲之傳其言曰吾父性正直書之外無他嗜口不
談道學而孝弟皆見之實踐睦姻任恤無德色泊民事

亟於家事不欺世亦不苟合於時以此若言證之年譜
行述所載言與行合烏乎可謂賢矣而懋元能道之必
能肖之是亦賢矣身賢子賢吾知傅氏之興未有艾也
王蟾生傳

君姓王氏初名權後更名源通其小名曰傳聲因諧其
聲曰蟾生而卽以爲字江蘇震澤人所居曰平望鎮於
吳江震澤兩縣無專屬而君之考以震澤籍爲太學生
故君亦籍震澤其先世富厚自祖以來稍陵替及君之
父曰平怡君窶甚至不能讀書廢而爲木棉之業君生
三歲能識字其祖母馮以所懸柱銘中孝弟詩書四字

教之屢試不忘十二歲從師讀書師督之嚴祖母馮及
本生祖母董每爲之泣目盡腫君事兩祖母亦盡孝馮
事佛常蔬食董嗜鱸魚旣卒遇忌日君必以供至今猶
循之君後又從徐江帆徵君游學益進所爲文喜宗漢
儒說不合有司律度至三十一歲始受知於學使者祁
文端公以第二名撥入蘇州府學然自此仍無所遇竟
以諸生終焉君所學壹以漢儒爲主而所作詩又有擊
壤集之遺音夷猶蕩盪蓋天性然也然其爲人介然不
苟一歲已館於孫氏至夏有富人某以重幣來聘不受
人曰某氏之幣三倍於孫却之何也君曰謂孫氏菲邪

不宜就之於先無則就之有美者而去之是龍斷也孫氏嘗以田數百畝質於他族將爲券書欲署君名署名者示與聞其事也俗謂之中人必有所酬謂之中金君執不可曰吾見訟田產者必追究其中人雖數十年後猶爲子孫累吾生平不爲中不爲媒媒固成人之美然爲德亦或爲怨吾不爲也況中乎其耿介類如此吳俗喜巫有病者不之醫而之巫巫之神最著者曰陳媼陳之夫曰楊而楊又有妾陳又有妹諸巫假其名行於江震閒其禳之法曰坐茶君嫉之如仇遇里有爲此者必呵斥之甚者覆其所供每深夜有以簫鼓送神者君

大書一版植門外當道曰王某之門邪神勿過後送神者皆迂道避焉性愛蘭常與翁陳兩君同買蘭花一次簍發之中有佳品直數十金妻勞氏曰蓋匿諸不可勞曰然則亦不宜先發其簍君曰匿其佳種私也必俟其至而發之是以私心度人尤不可也聞者歎服常購一羊裘貲不足其師徐徵君假以所值之半然君忍寒不服俟盡償所假然後服之徐徵君常歎曰吾門下不以貧而易業者王蟾生也是時粵賊已踞金陵江以南大聳君五十一歲始喪母張孺人兵荒之時喪皆以禮其明年君亦遂卒病革時問其子廷鼎曰汝讀書固矣若

貧不能自存將奈何廷鼎曰還是讀書君曰善遂不復有他言時咸豐八年十月丙寅也年五十有二君沒之後江浙皆陷平望爲賊往來孔道而君之柩及其母張孺人之柩猶未葬廷鼎出奇計假賊旗識冒險至平望載兩柩以出越四年始克葬於張王蕩祖塋君所著有禹貢札記月令考略鄉黨便讀各若干卷又博采班許馬鄭及晉唐諸儒之說禮制者條列於禮記陳澧集說之上而未成書所著詩有片雲集亂後皆失之惟其父半怡君在日喜時花君侍父吟賞有花臨襍詠今尙存草稿數十首塗乙幾不可辨廷鼎以意寫定存於家

論曰君有學有行不愧爲君子人而困於一衿未及中
壽而卒宜乎天之昌大其家以爲爲君子者勸而其子
廷鼎宦又不達至今猶以賣文自活何歟雖然君臨終
尙勉其子以讀書而鼎也果能讀書以副乃父之遺意
此卽天之所以報君也豈必軒冕哉鼎以君年譜求爲
之傳因撰次其事而論之如此爲王君幸更爲鼎也勉
也

錢母蒯太淑人傳

乾隆中嘉興錢文端公以詩文受

高廟知嘗以

其母南樓老人夜紡授經圖奏御

賜詩有嘉禾

欲續賢媛傳不愧當年畫荻人之句海內傳誦爲錢氏
美談公有女適吳江蒯公嘉珍字鐵崖而蒯公之子光
煥字婁生又以所生女歸文端曾孫子方錢君子方早
卒其子怡甫大令以母蒯太淑人事實乞余爲傳則文
端公之曾孫婦而實卽文端公之外曾孫女也余憬然
曰余何人斯其敢續嘉禾賢媛傳乎然余與子方爲同
歲生又與怡甫善固不得而辭乃惻述其略曰蒯爲吳
江望族其祖官廣西泗川府同知父以道光元年舉人
官廣西蒼梧縣知縣太淑人自幼工繡能書其兄士薌
廉訪授以毛詩見他書卽能成誦蒼梧君以書記屬之

嘗曰吾內有記室惜不憤也年二十歸於錢其君舅時
爲海昌校官海內所稱甘泉先生者也君姑胡太淑人
治家嚴太淑人在家事父母以孝聞及爲婦益謹伺姑
意旨不稍失道光二十四年子方舉於鄉其明年考取
景山官學教習留京師者三年而其夫弟子密君亦以
選拔貢生官吏部娣許淑人從之入京家事無巨細獨
任之上自尊章下至臧獲無閒言咸豐五年子方子密
皆乞假歸歸三月子方病太淑人謹事之日曉不交者
六十餘夕籲天請代竟罔效時太淑人年四十其子長
者十四歲幼者遺腹生每撫諸孤而泣曰我忍痛不死

者重傷二老心且以有若曹耳越兩年子密又入都太
淑人與姊許淑人素友愛命仲叔二子從之曰我豈忍
離若哉冀有成耳行矣毋我念至京逾月許卒已而程
淑人來歸讀太淑人與二子書歎曰是賢母也善視二
子如許在時固由兩姊之賢亦太淑人之所感深矣十
一年粵寇大至奉舅姑避於鄉子密適以養親乞歸乃
偕至澈浦浮海走餘姚慈谿又由甯波上海達九江渡
鄱陽湖依大塘程氏以居轉徙一載艱險萬狀外則子
密主之而周旋於內者太淑人也同治元年甘泉先生
病太淑人時亦病瘧力疾奉事幸而瘳而太淑人之病

亟矣卒之前一日猶思躬視其舅起居命人扶掖以行
憊而止翌日遲明遂卒時閏八月甲辰也年四十有八
太淑人平居無疾言意有所拂不見顏面衣雖敝猶不
易製諸子衣履必鮮黼常治鍼黹至午夜飢甚輒自嚙
其氣以解之其刻苦如此人有求者罔勿應得良方製
如法遇病者予之輒效人呼之曰萬應膏云胡太淑人
晚歲失明恒鬱鬱太淑人侍側多方娛樂之及卒胡太
淑人語其諸子曰爾母在日吾不自知無目也嘗夜課
其諸子讀書偶及歐陽公瀧岡阡表廢書而歎曰古人
少孤而能自立如此乎蓋以諷勵諸子也子五人發榮

附貢生兵部武選司主事肇元兩淮候補場大使志澄
廩貢生江蘇青浦縣知縣康榮縣學生候選縣丞芬榮
直隸候補縣丞女二人長者未嫁卒次適胡兆禧孫十
一人其長者鍾齡延齡振聲皆縣學生孫女七人曾孫
三人曾孫女二人余所據事實其第三子志澄所爲卽
怡甫大令也以同知直隸州知州在任候補加知府銜
遇 覃恩爲父母請三品封故稱太淑人云

論曰自范氏後漢書創立列女傳而後之作史者因之
然所載多奇節鮮庸行禮所謂婦順者在乎順於舅姑
和於室人而當於夫以戢絲麻布帛之事以審守委積

蓋藏如是而已豈必奇節哉錢氏在 本朝爲周之尹

吉太夫人以錢氏外曾孫爲錢氏婦其所稟承遠矣雖
其年不逾中壽其事不越庸行而今其諸子皆克自樹
立有聞於時未必非太淑人之所貽也何也婦順修而
內和理其效固宜然也恭譯 高宗詩意如太淑

人者非賢媛傳中之畫荻人乎後先暉映固於錢氏有
光而我 朝河洲之化亦可見矣

秦烈婦傳

秦烈婦崔氏直隸阜城人也光緒初畿輔大無江南諸
長者輸錢粟以振焉無錫秦君暉齋實預其事而厥弟

某字旭山者與之俱旭山勇於義凡散錢發粟必周行
糜鬻飲食必謹阜人崔公維新歎曰是誠善士以女女
之卽烈婦也光緒四年成婚於河閒府其年十月南歸
而旭山以久勞於外歸未久卽病婦侍疾寢食皆廢俄
而旭山卒婦以頭觸棺血漉漉誓俱死家人爭護持之
旣葬語人曰我以喪葬大事苟延殘喘今事畢矣上無
養親之職下無撫孤之任不死何爲幸無我阻也家人
百方慰解泫然曰旣娣姒輩苦勸願少留盡禮世俗自
初喪始每七日必設祭婦哭拜如禮將及五七遂絕食
勸之不聽強之則蒙被臥如是四日一息僅存會大雨

雪雪白屋簷入積牀下盈寸婦乘人不見掬食無算翌日體熱如火又五日始卒時光緒五年正月庚戌也距旭山之亡卅月乃悟所謂盡禮者自一七至五七稍盡祭禮也結縞百日遽隕所天竟以身徇絕食不死食雪以速之宛轉九晝夜始得從亡者於九泉烏乎慘矣嗚齋悲其志敬其烈乞余爲傳以報之因書大略附其家乘用俟采風者

顧孝子傳

光緒十二年十二月兩江總督江蘇巡撫吳元帥和顧孝子事實於年終彙題請旌表如律令從之於是烏頭綽

楔光耀門閭途人嗟歎籍籍稱顧孝子余家吳久得其
詳述大略告觀者孝子名標基顧氏江蘇元和人祖大
昌以詩畫名自號楞伽山民父曾壽躬行君子也矜孤
頤老重義輕利設塾以教蒙士輸財以拯災黎朝廷嘉
焉以道員注選籍并加三品銜又以其善承先志詔以
樂善好施四字建坊褒美其故父大昌鄉里榮之孝子
生有至性光緒六七年閒晉豫齊魯水旱殫臻待振甚
亟時其家稍替其父以力不足往往中夜而歎孝子年
甫八九齡知父意乃集兒時族姻中所贈金銀珠玉諸
玩物陳父前請助振父驚異之如其請不忍沒其名於

是江南諸大吏彙請於 朝以俊秀作國子監生賓州同銜加二級予五品封光緒十年母病晨夕扶持躬進藥餌又恐以廢學失父母意置書母榻旁默而誦之五閱月母病有閒明年夏母又病瞽孝子以舌舐之始而不效乃剖股肉和藥以進仍以舌舐至秋復明而孝子遂得嗽疾醫者曰元陽未足憂思過甚肝脾受傷不可爲也然孝子雖委頓牀褥聞父母聲必強起笑語將卒之夕執其母手曰兒不幸短命幸有弟兄在父母勿以兒爲念嗚咽久之遂卒時光緒十二年六月壬申也年十有四

余既撰次其事乃申論其後曰當孝子刲股時年甫十三耳東漢趙昱年十三母病慘戚消瘠目不交睫鄉黨稱其孝今孝子之年與趙昱同母病亦同然其事豈特如昱而已哉汪錡執干戈衛社稷孔子許其不殤夫死孝與死忠一也然則如孝子者若得聖人論定亦必在不殤之列可知矣